

Kommunalbestyrelsinut, nunaqarfimmi aqutsisunut aamma ilagiit sinniisaannut qinersisarneq pillugu Inatsisartut inatsisissaattut siunnersuummut nalinginnaasumik nassuiaa-
tit.

Siunnersuut inatsimmik atuuttumik iluarsaassinerullunilu nutarterineruvoq. Ilagiit sinniisaannut qinersisarneq pillugu maleruagassat siunnersuummi ilanngunneqarput. Ilagiit sinniisaannut qinersisarneq pillugu maleruagassat siusinnerusukkut allassimagaluarput Kalaallit Nunaanni ilageeqarneq pillugu Inatsisartut peqqussutaanni.

Partii sinnerlugu qinigassanngortissagaanni qinigassan ngortitsisoqarnissaq piumasaqaataanngilaq. Taamaallaat piumasaqaataavoq qinigassanngortittup partiimit akuersissutigineqarsimannissaa. Maleruagassaq Inatsisartunut qinersisarneq pillugu maleruagassanut naapertuuppoq.

Inuit kommunalbestyrelsimut qinersinermi qinersisinnaatitaasut amerlineqarput, taamaalillutik inatsimmi najugaqarnissamat piumasaqaatinik naammassinnittut tamarmik qiniseqataasinnaatitaalerlutik. Allannguummut tassunga tunngaviuvoq naalagaaffimmi sorlermi innuttaassuseqarneq tunngavigalugu assigiinngisitsisoqannginnissaa pillugu nunat avannarliit aalajangiussaqsimanerat.

Siunnersuut qinigassanngortittut immikkut sinniisussaqaqtarnerannik periusiusimasup atorunnaarsinneqarnissaanik siunnersuummik imaqarpoq. Siusinnerusukkut qinigassanngortittut tamarmik inummik ataatsimik imaluunniit marlunnik sinniisussaqaqtarput, qinigassanngortissimalluni qinigaasimasoq tunuaraangat taakku arlaat ilaasortanngortarluni. Siunnersuutigineqarpoq taamatut aaqqissuussineq atorunnaarsinneqassasoq, taarsiullugulu qinigassanngortittut qinigaanngitsut akornanni sinniisussanut nalunaarsuiffik suliarineqartalissasoq. Kommunalbestyrelsimi inissap inuttaaruttup inuttalerneqarnissaa nalunaarsuiffimmit tassannga tulleriarilluni qaffatsitsineqartarneratigit pitalissalluni.

Taamatut allannguinermut pissutaavoq tamatuma innuttaasut qinikkat aqqutigalugit naalakkersueqataanerannut naapertuunnerusutut isigineqarnera, tassami qinersisartut qaqutigunnaq qinigassanngortittup sinniisussai toqqammaviginiartarpaat. Periuseq nutaaq taanna allaffissornikkut pisariillisaataassaaq, tassami qinigassanngortittut sinnisussaasalu qinigassanngortitsinermut atatillugu atsiorerisa tamakkerlugit katersorniarneri ajornartorsiutaangaatsiartarsimapput.

UKA 1996/9

Allattoqqarfik jnr. 12.02

Siunnersuummi inatsisip oqaasertalersorneqarnera allanngortiterneqarpoq. Tamatum kingornatigut kommunit tamarmik qinersivik ataasinngussapput, qinersivinnilu tamani taasiartorfiit arlaqarlutik.

Siunissami kommunip qinersivik ataasinngortinneqarnissaanik siunnersuut 1994-imi kommunalbestyrelsinut tusarniaatigineqarsimavoq kommunini aqutsinermut inatsisip allanngortinneqarnissaanik Kommuninik iluarsaaqqinnermi Kommissionip siunnersuutaata UKA/94-imi saqqummiunneqarneranut atatillugu, taamanikkut bygderådit nunaqarfimmi aqutsisunut allanngortinneqarput periarfissinneqarlutillu annertunerusumik akisussaaffilerneqarnissaminnut nunaqarfimmilu namminermi pissutsinut ineriartortinneqarneranullu oqartussaaffilerneqarnissaminnut.

Kiisalu siunnersuut oqaluuserineqarpoq Qaqortumi 1995-imi nunaqarfiit ataatsimeersuartinneqarneranni, tassani aalajangiunneqarpoq oqartussaassuseqarnermut periarfissat nutaat pillugit aammalu kommunip qinersivik ataasinngortinneqarnissaanik siunnersuut pillugu oqallinneq nunaqarfinni ataasiakkaani nanginneqassasoq.

Peqatigitillugu kissaatigineqarsimavoq periarfissiisoqassasoq nunaqarfiit marluk amerlanerilluunniit ataatsimuulersinneqarnissaannut, taamaalillutik ataatsimoorussaminnik nunaqarfimmi aqutsisoqalersinnaasunngorlugit.

Ilagiit sinniisaat eqqarsaatigalugit ilagiit sinniisaanni ilaasortat amerlassusaat allanngortinneqassasoq siunnersuutigineqarpoq, taamaalillutik ilagiit qanoq amerlassuseqarnerannut takussutisaa nerusunngussallutik.

Siunnersuut imaqarpoq aalajangersakkanik arlaqartunik kommunalbestyrelsimut qinersinermut, nunaqarfimmi aqutsisunut qinersinermut aamma ilagiit sinniisaannut qinersinermut atuuttunik. Tamatumunnga pissutaavoq qinersinerit ingerlanneqartarneranni assigiinnerusumik ingerlatsisoqartalernissaanik kissaateqarneq.

Siunnersuummi aalajangersakkanut ataasiakkaanut nassuiaatit.**§ 1 pillugu.**

Inuit kommunalbestyrelsimut qinersisinnaatitaasut amerlineqarput. Siusinnerusukkut taamaallaat inuit danskisut innuttaassusillit aammalu nunani avannarlerni innuttaassuseqartut, najugaqarnissamik piunasaqaatinik naammassinissimasut, kisimik qinersisinnaatitaapput. Siunnersuutigineqarpoq kinaluunniit najugaqarnissamik piunasaqaatinik inatsimmi taaneqartunik naammassinissimasoq qinersisinnaatitaassasoq. Kiisalu kommunimi qaammatini pingasuni aalajangersimasumik najugaqarsimanissamik piunasaqaat sap. akunnerini arfinilinni najugaqarsimanissamut killilerneqarpoq, tamanna qinersisartunik nalunaarsuiffiit suliarineqarsinnaaneranni teknikkkut pisinnaasanik patsiseqarsimavoq.

Najukkatut paasineqassaaq inuit nalunaarsorneqarnerat pillugu Nalunaarutip (nalunaarut nr. 652, 27. juli 1995-imeersoq) § 1-iani imm. 3-a malillugu "sumiiffik (najugaq) akuttunngitsumik siniffigisartagaq sulinngiffeqarneq, suliamut atatillugu angalaneq, napparsimaneq taamaaqataluunniit pissutigalugu peqanngikkallanngikkaanni, tassanilu pigisat inissisimappata."

Aalajangersimasumik najugaq kommunimi pigiinnarneqarpat innuttaasoq pigallartumik kommunip avataaniittoq pisinnaatitaavoq kommunimi angerlarsimaffigisamini nalunaarsorneqarsimaannarnissaminut, tamatumani tunngavissaatillugu piffissap ungasinngitsup iluani angerlarnissap siunertarineqarnera. Assersuutigalugu taanna pingaaruteqarsinnaavoq ilinniagaqartunut piffissami sivikitsuinnarmi kommunip avataaniittariaqartunut taassuma aalajangersimasumik najukkani, t.i. namminerisaminik ineqarfini imaluunniit ilaquuttamini, aalajangiusimaannarpagu.

§ 2 pillugu.

Taanna piunasaqaat erseqqinnerulersinniarlugu immikkut aalajangersakkatut inissinneqarpoq.

§ 3 pillugu.

Taanna piunasaqaat erseqqinnerulersinniarlugu immikkut aalajangersakkatut inissinneqarpoq.

§ 4 pillugu.

Maleruagassami ilaatigut mianerineqarpoq pineqaatissinneqarsimaneq naammassineqarsimassoq ulloq qinersivissaq ukiunik pingasunik sioqqullugu, taamaalilluni qinigaasoqarsinnaanngilaq assersuutigalugu misiligummik iperagaasimagaanni imaluunniit ullormi qinersiviusumi suli nakkutigisaagaanni.

Pinerluuteqarsimanikkut pineqaatissinneqarsimaneq pissutigalugu sioqqutsisumik qinigassann-

gortinnissamut itigartinneqarsinnaannginneq pillugu aalajangersagaq § 18-imiit nuutaavoq uani inissisimanissaa naleqqunerpaammat.

§ 5 pillugu.

Oqaasertaliornera allangortinneqarpoq imaalillugu kommunit tamarmik qinersivik ataasingortinneqarlutik taasiartorfinnut agguataarneqarsinnaasut. Inatsimmut ilanngussaq atorunnaarsinneqarpoq inatsisiliornermi periaatsit pissutigalugit. Taarsiullugu aalajangersakkami ilaatinneqarpoq kommunalbestyrelsimi ilaasortat amerlassusissaasa Naalackersuisunit aalajangersarneqarsinnaanerat, aamma taanna pingaaruteqalersinnaavoq ikippallaartunik qinigassanngortitsisoqarneranut atatillugu, tak. § 19. Qinersivinni ataasiakkaani taasiartorfiit kommunalbestyrelsimilu ilaasortat amerlassusissaat siunissami nalunaarutitut ilusilerlugit aalajangersarneqartalissapput.

§ 6 pillugu.

Qinersineq ullormi qinersivimmi unnuap ullullu nikinneranniit naatsorsuunneqassaaq.

§ 7 pillugu.

Aalajangersagaq ilanngunneqarpoq inatsisartunut qinersisarneq pillugu inatsimmut assingutitsinissaq siunertaralugu. Allangguutissatut siunnersuutigineqartoq ulluinnarni periusiusunut naapertuuppoq. Qinersinermik allattaavinni allanneqartussatut pingaaruteqartutut isumaqarfigineqartut pillugit assersuutit qinersinissanut ilitsersuutini ilanngussuunneqassapput.

§ 8 pillugu.

Naatsorsuutigineqarpoq qinersinermi siulersuisut inuttalersugaanerat kommunalbestyrelsip ilaasortaasa katitigaanerannut naapertuutissasoq. Inuttut soqutigisat pissutigalugit ilaasortaasinnaannginnissamik aalajangersagaliortoqarnissaa, taamaalillunilu qinigassanngortittoq qinersinermi siulersuisunut ilaasortaasinnaassanani, siullermeeraluni oqaluuserinninnermut atatillugu siunnersuutigineqarsimavoq. Kisianni siunnersuut peerneqarpoq arlallit tungaanniit oqaatigineqarmat kommunalbestyrelsimi ilaasortat tamarmik amerlanerpaatigut qinigassanngorteqqittartut. Taamatut pisoqartillugu qinersinermi siulersuisut (tamarmiusut) toqqarneqarsinnaasassanngillat.

§ 9 pillugu.

Malittarisassakkut inuttut soqutigisat pissutigalugit ilaasortaasinnaannginnissamik aalajangersagaliortoqarpoq, taamaalilluni qinigassanngortittoq taaguinermi siulersuisuusinnaassanani. Allangguutissatut siunnersuutigineqartoq ulluinnarni periusiusunut naapertuuppoq.

Siunnersuummi qinersinermi siulersuisut qinersisartunik qinersinermi ikiuuttussanik toqqaasinnaanissaannut periarfissiisoqarpoq. Aalajangersagaq attuumassuteqarpoq § 36-mi imm. 4-mut.

§ 10 pillugu.

Taamatut suliasinneqarneq pineqartut pisussaaffigaat (pisortanit toqqakkatut suliaqarneq). Aamma siusinnerusukkut qinersisartut ikiuuttut aningaasanik ajunngitsorsiassaqaartinneqartarmata § 9-mi allanngineq aningaasartuutit amerleriarnerinik kinguneqartussaangilaq.

§ 12 pillugu.

Siusinnerusukkut qinigassanngortittoq ataaseq inummik ataatsimik imaluunniit marlunnik sinniisussaqaartussaasarpoq. Siunnersuutigineqarpoq aaqqissuussineq taanna allanngortinneqasasooq, kommunalbestyrelsimi inissaq inuttaarukkaangat sinniisussatut nalunaarsuiffimmik taasami allassimasunik ilaasortanngortitsisarnikkut inuttaliisarnissaq innuttaasut qinikkat aqqu-tigalugit naalackersueqataanerannut naapertuunnerusutut isigineqarmat. Takukkit §§ 42-mut aamma 51-imut nassuiaatit.

§ 13 pillugu.

Partii sinnerlugu qinigassanngortittut qinigassanngortitsisoqassanngillat, qinigassanngortinneralli partiimit akuersissutigineqarsimassaaq. Kommunalbestyrelsimi ilaasortaasussat amerlanerpaamik marloriaataannik partiit qinigassanngortitsisinnaanerat pillugu aalajangersagaq ilanngunneqanngilaq killiliinissaq naleqquttumik tunngavissaqarsorineqanngimmat aammalu killiliinissaq sinniisussanut nalunaarsuiffimmut tunngatillugu ajornartorsiutaalersinnaammat.

Partiit qinersinermi kattusseqatigiissinnaannginnerat pillugu aalajangersagaq ulluinnarni periususunut erseqqissaataavoq.

§ 14 pillugu.

Qinigassanngortinnermi atermik taaguummik atuineq Qinersinermut Ataatsimiititaliamut akueritereernikkut pisinnaavoq. Atermik taaguummik atuinissamut akuereqqulluni qinnuteqaatip akuersissutigineqarsinnaaneranut aalajangiisuussaaq ateq qanoq ittuunersoq qanorlu atornerqarnersoq, tassungalu ilanngullugu qinigassanngortittup ateq suna atorneraa aterlu suna atorlugu atsiortarnersoq aammalu ateq pineqartoq nalinginnaasumik atugaanersoq.

§ 17 pillugu.

Aalajangersagaq siunnersuutigineqarpoq 1993-imi qinersinermi apeqquteqaatigineqarsimasooq tunngavigalugu.

§ 18 pillugu.

Pinerluuteqarsimanikkut pineqaatissinneqarsimaneq pissutigalugu qinigassanngortinnissamut sioqqutsisumik itigartinneqarsinnaannginneq pillugu aalajangersagaq § 4 imm. 2-mut nuunneqarpoq.

Kiisalu siunnersuutigineqarpoq pisariillisaasoqassasoq, tassa qinigassanngortitap nalunaarutigineqarnerani kukkuneqarsimappat siunissami qinigassanngortittoq saaffigineqartalissasoq qinigassanngortitsisut saaffigineqaratik.

§ 19 pillugu.

Qinersinermi siulersuisut kajumissaaruteqaraluartut naammattunik qinigassanngortitsisoqanngippat Naalakkersuisut § 5, imm. 2 tunngavigalugu aalajangersinnaapput qinersivimmi pineqartumi kommunalbestyrelsime ilaasortatut qinigassat amerlassusissaat appartinneqassasoq.

§ 21 pillugu.

Ukiumi qinersivimmi taamaallaat qinersisussat allattorsimaffii suliarineqartartussaapput. Piffissaliusseq allannngortinneqarpoq kommunime aalajangersimasumik najugaqarsimanissamut piffissaliussap sap. akunneri arfinilinnut allannngortinneqarnissaata § 1-imi siunnersuutigineqarnera pissutigalugu. Piffissaliutassatut siunnersuutigineqartoq teknikikkut pisariaqartitaavoq Kalaallit Nunaanni inuit allattorsimaffianniit, KIA, allattukkanik pissarsinissaq allattuiffillu kommuninut tamanut nassiusuunneqarnissaat pissutigalugit. Oqaasertaliornerata assigaa inatsisartunut qinersisarneq pillugu inatsimmi allassimasut.

§ 22 pillugu.

Oqaasertaliornera § 5-imut naapertuuppoq allannngortinneqarlunilu imaalillugu, kommunit tamarnik qinersivik ataasiusut taasiartorfinnut agguataarneqarsimasinnaasut.

Qinersisussat allattorsimaffiata imarissavai qinersisartooq ilagiinnut ilaasortaanersooq pillugu paasissutissat, tassa ilagiit sinniisaannut qinersineq ullormi tassani aamma ingerlanneqassamat. Paasissutissarli taanna tamanut saqqummiunneqaqqusaanngilaq paasisinneqarsinnaatitaaneq pillugu inatsimmi inunnut tunngassuteqartut pillugit aalajangersakkat malillugit. Aalajangersakkat taakku malillugit aamma qinersisartut inuttut normui isertuunneqassapput.

§ 23 pillugu.

Qinersisartut allattorsimaffiisa saqqumitinneqartarnissaat ulluinnarnut marlunnut allannngortinneqarpoq. Qinersisartut allattorsimaffiisa saqqumitinneqartarnerat pisassaaq taasiartorfinni ataasiakkaani qinersisartut allattorsimaffiat taasiartorfimmut atuuttoq saqqumitinneqartassalluni. Tamatumunnga peqatigitillugu qinersivimmi qinersisartut allattorsimaffiat tamarniusooq tamanit tikinneqarsinnaasumi saqqumitinneqassaaq.

§ 24 pillugu.

Qinersisartut allattorsimaffiat pillugu naammagittaalliuutit tunniunneqassapput qinersinermi

siulersuisunut, taakku aalajangiineri Qinersinermut ataatsimiititaliamut ingerlateqqinneqarsinnaapput tamatumani apeqquiti ilagiinnut tunngasuunngippata, tamakku Kalaallit Nunaata Biskoppeqarfiani biskoppimut tunniunneqartussaapput.

§ 27 pillugu.

Taamaallaat taasisoqarsinnaavoq partiit ilaata imaluunniit qinigassanngortitat ilaata inimi taasivimmi allagartaliunneqarsimasut aqqata allanneqarneratigut. Taasisoqarsinnaangilaq kattusseqatigiit taaguutaata pappiaramut taasivimmut allanneqarneratigut.

§ 30 pillugu.

Imm. 7 naapertorlugu maannakkut periarfissaqalerpoq naalagaaffiup avataaniit, sulingiffeqarneq imaluunniit allanik patsiseqarluni pigallartumik nunami allamiikkaanni, allakkatigut taasivissamut. Takukkit § 1-imut nassuiaatit.

Imm. 8 naapertorlugu maanna umiarsuarmi Kalaallit Nunaanni angerlarsimaffeqartumiikkaanni umiarsuup naalagaanut taasisoqarsinnaalerpoq. Aalajangersakkap nutaap taassuma ilanngunneqarneranut pissutaavoq illoqarfimmuut inuit aqqisa nalunaarsuiffiannik allaffilimmuut tulannissat ajornarajuttarmata. Umiarsuit Kalaallit Nunaanni angerlarsimaffeqartut tassaapput umiarsuit Kalaallit Nunaanni nalunaarsorneqarsimasut imaluunniit inuttaqartereernagit Kalaallit Nunaanni umiarsuaatilinnit attartorneqarsimasut, tamanna akileraartarneq pillugu inatsimmi nassuiaammut naapertuuppoq.

§ 31 pillugu.

Kalaallit Nunaanni allakkatigut taasineri atortussat tassaapput allakkatigut taasivissaq, taassumalu immikkut puussaa, immersugassaq allakkatigut taasivimmut malinnaasussaq kiisalu puussaq allakkat puuata taasivimmik imallip immersukkallu malinnaasussap ataatsimoortillugit kommunimut qinersisartup qinersisussat allattorsimaffianiiffigisaanut nassiunnerini poorineqartussaq.

§ 34 pillugu.

Allakkap puui allakkatigut taasivinnik imallit qinersineq aallartitsinnagu taasivissamut qinersisartup taasisinnaaffigisaanut apuutereersimassapput.

§ 35 pillugu.

Taamaallaat qinersisartup allakkatigut taasisimasup aqqata nalaatigut krydsiliisoqartassaaq allakkatigut taasineq pineqartoq ilaatinneqartussatut naatsorsuunneqarsimagaangat. Imm. 2-mi allakkatigut taasinerit ilaatinneqarsinnaannginnerinut pissutaasinnaasut assigiinngitsut taaneqarput.

Allakkatigut taasineq naatsorsuunneqarsinnaasimappat qinersisartoq pineqartoq ullormi qinersi-

vimmi taasisinnaanngilaq, takuuk imm. 4. Allakkatigut taasineq naatsorsuunneqarsinnaasimangippat qinersisartoq qinersisinnaanermut piunasaqaatit eqquutsikkunigit ullormi qinersivimmi taasiartorsinnaavoq.

§ 36 pillugu.

Taaguinermi siulersuisoq taasinerik kisitsissaaq. Siullermik partiinik ataasiakkaanik, kattusseqatigiinni qinigassanngortittunut taasinerit kiisalu qinigassanngortittunik ataasiakkaanik taasinerit ataatsimoortukkaarlugit immikkoortiterneqassapput. Partiinik ataasiakkaanik taasinerik oqarnermi pineqarput partiinik taasinerit kiisalu partiit ataasiakkaat qinigassanngortitaannik taasinerit. Kattusseqatigiit qinigassanngortitaat eqqarsaatigalugit kattusseqatigiinni qinigassanngortittunut ataasiakkaanut taasinerit ataatsimoortillugit immikkoortinneqassapput. Malugiuk kattusseqatigiit taaguutaata pappiaramut taasivimmut allanneqarneratigut taasisoqarsinnaanngimmat.

Partiinut ataasiakkaanut, kattusseqatigiinnut ataasiakkaanut aammalu partiit kattusseqatigiillu avataasigut kisimiillutik qinigassanngortittunut taasinerit kisinneqareerpata, kisinneqassapput partiini kattusseqatigiinnilu qinigassanngortittunut ataasiakkaanut taasinerit qassiusimanersut.

Taasinernik kisitsinerit tamanut ammasuupput qinersisinnaasullu akornanni inuit ikinnerpaamik marluk nalunaajaasussatut najuutissapput.

§ 37 pillugu.

Aalajangersakkami tassani allagartap taasiviup atorsinnaanngitsutut naatsorsuunneqarsinnaaneranut pissutaasinnaasut nalunaarsorneqarput. Aalajangersakkat maannakkumut inatsimmi immikkoortuni assigiinngitsuni inissitsitersimagaluarput maannakkulli ataatsimoortinneqalerlutik. Kiisalu imm. 4-mi aalajangersagaliortoqarpoq Naalakkersuisut allagartat taasiviit naliliiffigineqartarnissaannut malittarisassanik aalajangersaasarnissaannut piginnaatillugit.

§ 38 pillugu.

Kisitsinerit naammassineqarniariartut nutaamik kisitsisoqassaaq (kisitseqqittoqassaaq). Taamaaliortoqaqqittaartaartoqassaarlu kisitsinerit marluk assigiimmik inerneqalernissaasa tungaannut. Aalajangersagaq inatsisartunut qinersinermi kisitsinerimut naapertuuppoq.

§ 40 pillugu.

Taasiartorfinni ataasiakkaani kisitsinerit naammassineqarniariartut qinersivimmi qinersinermi siulersuisunut nalunaartoqartassaaq. Qinersinermi siulersuisut inernerit ingerlaannaq Qinersinerimut Ataatsimiititaliamut ingerlateqqittassavaat. Qinersinermi siulersuisut qinersinerit inernerinik Qinersinerimut Ataatsimiititaliamut nalunaaruteqarneri taasiartorfikkaartumik pisassapput.

§ 41 pillugu.

Erseqqissarneqarpoq ilaasortaaffiit agguarneqarneranni d'Hondtip amerlassutsit tungavigalugit naatsorsuisarnermi periaasiata atorpeqarnissaa.

§ 42 pillugu.

Siusinnerusukkut qinigassanngortittut tamarmik immikkut ataatsimik imaluunniit marlunnik sinniisussaqaartarput. Siunnersuutigineqarpoq aaqqissuussinnermut tassunga taarsiullugu qinigassanngortittut qinigaanngitsut akornanni sinniisussanut nalunaarsuiffik suliarineqartalissasoq, taakku tulleriinnilersornerini taasinerit pissarsiarisimasaat tunngaviusassapput.

Ilaasortaaffiup inuttaarunneratigut sinniisussat sinniisussanut nalunaarsuiffimmi tulleriinnilersuineri inissisimanertik malillugu ilaasortanngorsinnaapput. Qinigassanngortitaq qinigaaffiup ingerlanerani attavigisaminik allannguippat kingusinnerusukkullu Inatsisartunit tunuassagaluarpat tunngavigineqassaaq qinersineri qinigassanngortitap sumut attaveqarsimanera, t.i. sinniisussamik ilaasortanngortitsineqassaaq partiip imaluunniit kattusseqatigiiffiup qinigaasitsisimasup sinniisussanut nalunaarsuiffianit. Tamatuma aamma nassataraa kisimiilluni qinigassanngortissimasoq qinigaaffiup ingerlanerani partiimut ilaasortanngorpat kingusinnerusukkullu ilaasortaajunnaassagaluarpat taava naammaqutissamik qinersineqassaaq.

Taamatut nutaamik aaqqissuussineq innuttaasut qinikkat aqqutigalugit naalackersueqataaneranut naapertuunnerussaaq, tassami qinersisartut qaqutiguinnaq qinigassanngortittup sinniisussai toqqammaviginiartarpaat. Peqatigitillugu periuseq taanna qinigassanngortitsinernik tigooraanerami allaffissormikkut pisariillisaataassaaq, tassami sinniisussat ataasiakkaat pillugit paasissutissat pissarsiariniartariaarutissapput aammalu tamarmik immikkut atsiortinniartariaarutissallutik.

Aalajangersakkat siullermeerineri §§ 49-tut aamma 50-itut allassimagaluarput.

§ 45 pillugu.

Oqaasertaliornera pisariillisarneqarpoq, tassa oqaatsitigut "kialluunniit qinersisartup" pineqarmata inuit siusinnerusukkut taaneqarsimasut maannakkullu peerneqartut.

§ 48 pillugu.

Oqaasertaliornera pisariillisarneqarpoq, tassa siusinnerusukkut imm. 1 aamma imm. 2 imarisamikkut imminnut ikorfartormata.

§ 50 pillugu.

Aalajangersakkami tassani qanoq pisoqartillugu sinniisussat ilaasortanngortarsinnaanerit taaneqarpoq.

§ 51 pillugu.

Aalajangersakkami tassani inissap inuttaaruttup qanoq ililluni inuttalernerqartarnissaa taaneqarpoq, tamatumani apeqqutaatillugu qinigassanngortittoq partiimeersuunersoq, katusseqatigiinner-suunersoq imaluunniit kisimiilluni qinigassanngortittoq kommunalbestyrelsimit tunuartuuner-soq.

Aalajangersakkami tunngaviuvoq ilaasortaaffik inuttaaruttoq inuttalernerqassasoq sinniisussanut nalunaarsuiffiusinnaasumiit. Sinniisussaqaanngippat tamatigut naammaqutissamik qinersine-qassaaq, tamatumani pissutaappat kisimiilluni qinigassanngortittup tunuarnera imaluunniit sinniisussanut nalunaarsuiffimmiittut nungunnerat. Naammaqutissamik qinersineqarnissaanik pingaarnerusumik maleruagassap saneqqunneqarnissaanut § 52-imi periarfissiisoqarpoq.

§ 52 pillugu.

Naammaqutissamik qinersineqarnissaata pinngitsoortinneqarnissaanut periarfissaq atatiinnar-neqarpoq, naak aalajangersagaqqaartoq sinniisussanut nalunaarsuiffiit pillugit maleruagassat nutaat pissutigalugit allannguivigineqaraluartoq.

Aallaqqaammut ilaasortani amerlanerussuteqartuni pineqarpoq qinersineqaannginnissaanik akuersisut amerlassutsimikkut naapertuutissasut kommunalbestyrelsimi tamarmiusumi amerla-nerussuteqartut taasinerisa amerlassusiat.

§ 53 pillugu.

Eqqartuussisuuneq ataatsimiititami siulittaasuussaaq, taassuma arlaannaannulluunniit attuumas-uteqaannginnera erseqqissarniarlugu.

Ataatsimiititap inuttalersugaaneratigut siunertarineqarpoq kommunalbestyrelsinut, nunaqarfim-mi aqutsisunut aamma ilagiit sinniisaannut ilaasortat qinigaasinnaassusaasa misilinneqarnissaa-nut tunngavissat sapinngisamik assigiissinneqarnissaasa anguneqarnissaa.

Imm. 9-p oqaasertaliornerani allannguineq tassaaginnarpoq inaarutaasumik aalajangiisoqarnis-saanik erseqqissaaneq. Tamatumuunali innuttaasup eqqartuussivinnut suliassamik saqqummius-sisinnanera mattunneqaanngilaq.

Ilagiit sinniisaannut ilaasortat qinigaasinnaassusaasa misilinneqarnissaa Kultureqarnermut, Ilinniartitaanermut Ilageeqarnermullu Pisortaqarfimmiit nuunneqarpoq. Taamaattumik suliassa-ni taamaattuni biskoppi aggersarneqartassaaq.

Tamatumani pisariaqartitsineq malillugu aningaasartuutissat, tassunga ilanngullugu allattoqar-nikkut ikiorsiineq qinersinermut kontUmit nuunneqassapput.

§§ 54 - 61 pillugit.

Aalajangersakkat oqaasertaliorneqarnerisa allanngortinneqarnissaannut siunnersuuteqartoqanngilaq, kisianni kapitalimi tamarmi tulleriinnilersuineq allanngortiterneqarpoq inatsisip kapitalii ilusilersugaanermikkut assigiiartuutinneqarnissaat anguniarlugu.

Maannakkut nunaqarfimmi aqutsisuusut qinigaaffiat pillugu nooriarnermi aalajangersakkat inatsisip § 79-iani ilanngunneqarput.

§ 62 - 71 pillugit.

Kapitalimi tamarmi tulleriinnilersuineq allanngortiterneqarpoq ilageeqarneq pillugu peqqussummi 1982-imeersumi aalajangersakkanut maannakkumut atuuttunut naleqqiullugu inatsisip kapitalii ilusilersugaanermikkut assigiiartuutinneqarnissaat anguniarlugu.

§ 62 pillugu.

Ilageeqarneq pillugu inatsisartut peqqussutaat 1982-imeersoq malillugu ilagiit sinniisaannut qinersisinnaatitaanissami tunngavissaatitaapput kommunalbestyrelsimut qinersisinnaatitaaneq aamma Ilagiinnut ilaasortaanissaq Ilagiit avataani upperisaqaqatigiinnut allanut ilaasortanngor-simannginnissaq imaluunniit allatut - soorlu kuiseqqinnikkut imaluunniit ersitsumik upperisamik miserratiginninnikkut - akerlilersuisuunnginnissaq.

Aalajangersakkap naggataatungaa inatsisissatut siunnersuummi ilanngunneqanngilaq, tassa naatsorsuutigineqarmat najukkami palasip naliliiffigiuartassagaa inuup ilagiinnut ilaasortaanera taaneqartut pissutigalugit atorunnaarsimanersoq.

Siunnersuutigineqartutut oqaasertaliorneqarnera pissuteqarpoq inuttut pisinnaatitaaffiup taama mianernartigisup ilagiit sinniisaannut qinersisoqartussaanera pissutigiinnarlugu aalajangiivigineqarnissaa tulluurtuusorineqanngimmat.

Palasip aalajangiinera pillugu naammagittaalliuutaasinnaasut biskoppimit suliarineqarsinnaapput pisariaqartinneqarpallu eqqartuussivitsigut aalajangiivigineqarsinnaalluni qinersinissamut atatillugu piffissaliussaqaq naatinnagu. Maleruaqqusat maannakkumut ilusiligaaneri tunngavigalugit malersuisoqarsinnaaneranut periarfissaqarluarpoq.

§ 63 pillugu.

Imm. 1-imi 2-milu aalajangersakkat kommunalbestyrelsimi ilaasortanut atuuttut assigaat (§ 4).

Ilageeqarneq pillugu peqqussut 1993-imeersoq malillugu ilagiit sinniisaanni ilaasortaapput ilagiit sinniisaannut qinigaasut aammalu najukkani palasit ajoqillu. Palasit ajoqillu taamaalillutik ilagiit sinniisaanni ilaasortaausaareermata sinniisinut qinersisoqarnerani taakku qinigas-

sannortittarnissaat isumaqanngilaq. Paatsoortoqannginnissaa anguniarlugu maannakkut siunnersuutigineqarpoq ilaasortaareersussat qinigaasinnaannginnerat ersarissumik takuneqarsinnaasasoq.

Ilageeqarneq pillugu peqqussummut 1982-imeersumut naleqqiullugu nutarterineq ataaseq maani taaneqassaaq: Siusinnerusukkut ilagiit sinniisaasa ataasiakkaat namminneerlutik aalajangissaavaat ilaasortap qinigaasinnaanini annaasimaneraa, assersuutigalugu pinerluuteqarsimanerminut eqqartuunneqarnermigut, ilagiillu sinniisaasa aalajangiineri Nunatta biskoppianut suliassanngorteqqinneqarsinnaallutik. Inatsisissatut siunnersuummi matumani aalajangersakkat taakku atorunnaarsinneqarput, tassa qinigaasinnaassuseq pillugu ataatsimiititaliaq § 53-imi taaneqartoq aamma ilagiit sinniisaannut tunngatillugu atuummat.

§ 64 pillugu.

Ilageeqarneq pillugu peqqussut 1982-imeersoq malillugu Ilagiit kalaallit siulersuisui aalajangiisussaapput najukani 30 sinnerlugit inulinni oqaluffeqaratilluunniit atuarfiutigisumik naalagiarfarfeqanngitsuni qinersisartut ilagiit sinniisaannik qinersinermi sumi peqataasinnaersut. Kisianni ilageeqarneq pillugu peqqussutikkut nutaakkut oktober 1993-imeersukkut Ilagiit kalaallit siulersuisui atorunnaarsinneqarput, ilageeqarnermilu suliassat Biskoppeqarfiup allaffianit allaffissornikkullu suliassat Kultureqarnermut, Ilinniartitaanermut Ilageeqarnermullu Pisor-taqarfimmit isumagisassanngortinneqarlutik. Tassa imaappoq inatsisissatut siunnersuummi matumani aalajangiinissamut oqartussaassuseq qulaani taaneqartoq Naalackersuisunut nuunneqarpoq.

Siunissami nalunaarutitut ilusilerlugu nalunaarutigineqartassaaq ilagiit sinniisaannut sumi qinersisoqassanersoq sinniisillu qassiussanersut. Siunertarineqarpoq maannakkumut qinigaasinnaasunut allattuiffik tallineqassasoq, taamaalillutik sinniisit amerlanerpaamik 14-iussallutik, tassa maannakkumut maleruaqqusat malillugit Nuummi ilagiit sinniisaat Sisimiuni ilagiit sinniisaasut amerlassuseqaannarmata, naak Nuummi innuttaasut Sisimiuni innuttaasunit pingasoriaatip missaanik amerlanerugaluartut.

Ilagiit sinniisaannut qinersisarnermi maannakkumut perisiusunut nangissutitut tunngavigineqassaaq ilagiit sinniisaannut qinersisoqartassamat sumiiffinni qinersinissaq ukiumik sioqqullugu januarip aallaqqaataani inunnik nalunaarsuiffimmi naatsorsukkat malillugit minnerpaamik 30-nik innuttaqartuni oqaluffeqartuni imaluunniit atuarfiutigalutik naalagiartarfilinni.

Aammattaaq maannakkumut perisiusunut nangissutitut ilagiit sinniisaanni ilaasortat amerlassusissaat aalajangersarneqartassapput innuttaasut amerlassusaannut allattukkat ataaniittut malillugit:

Najukkani 30 - 500 inulinni sinniisit 3 qinerneqassapput.

Najukkani 501 - 1.000 inulinni sinniisit 4 qinerneqassapput.
Najukkani 1.001 - 1.500 inulinni sinniisit 5 qinerneqassapput.
Najukkani 1.501 - 2.500 inulinni sinniisit 6 qinerneqassapput.
Najukkani 2.501 - 3.500 inulinni sinniisit 7 qinerneqassapput.
Najukkani 3.501 - 4.500 inulinni sinniisit 8 qinerneqassapput.
Najukkani 4.501 - 6.500 inulinni sinniisit 9 qinerneqassapput.
Najukkani 6.501 - 8.500 inulinni sinniisit 10 qinerneqassapput.
Najukkani 8.501 - 10.500 inulinni sinniisit 11 qinerneqassapput.
Najukkani 10.501 - 14.500 inulinni sinniisit 12 qinerneqassapput.
Najukkani 14.501 - 18.500 inulinni sinniisit 13 qinerneqassapput.
Najukkani 18.501 taakkulu sinnerlugit inulinni sinniisit 14 qinerneqassapput.

§ 67 pillugu.

Ilagiit ataatsimiisinneqarnissaasa sapinngisamik amerlasuunit ilisimaneqarnissaa qulakkeerniarlugu ataatsimiinnissaq pillugu nalunaarut uterneqartassaaq naalagiarnerni arlalinni, taassuma saniatigut ataatsimiinnissaq allagarsiinikkut nalunaarutigineqassaaq. Oqaasertaliornera tamanut saqqummiussinissaq pillugu aalajangersakkanut allanut naleqqussaaneruvoq. Qinigassanngortit-sisussat pillugit aalajangersakkat § 68-imi katersorneqarput.

§ 70 pillugu.

Kommunalbestyrelsinut qinersineq assigalugu ilagiit sinniisaannut qinersinermi immikkut sinniisussaqartoqassanngilaq. Taamaattumik sinniisussanngortussaaajumaartut toqqarneqartassapput sinniisussat nalunaarsuiffianniit, taamaalillutik qinigassanngortittut qinigaanngitsut amerlanerpaamik taagorneqartut sinniisussatut ilaasortanngorsinnaassallutik.

Ilagiit sinniisaannut aamma kommunalbestyrelsinut qinersinermi maleruagassat sapinngisamik assigiisinneqarnissaat anguniarneqarsimavoq sapinngisamik aningaasartuutit apparsarniarlugit pisariaqanngitsumillu allaffissornerujussuaq pinaveersaartinniarlugu. Taamaattumik inatsisissatut siunnersuutip kapitali 1-iani aalajangersakkat aamma ilagiit sinniisaannut atuupput.

§ 71 pillugu.

Tassani eqqartorneqarput qanoq pisoqarneratigut sinniisussamik ilaasortanngortoqassanersoq aammalu qanoq pisoqarneratigut naammaqqusertoqarsinnaanersoq.

§ 79 imm. 2 pillugu.

Nunaqarfinni aqutsisut atuuttut inatsit maannakkumut atuuttoq malillugu qinigaapput piffissamut 1. juni 1993-imiit 31. maj 1997-imut. Piffissaq qinigaaffik taanna qaammammik ataatsimik sivikillineqarpoq nunaqarfinni aqutsisut tunuartussat ikkuttussallu ataatsikkut atuunnissaat pinngitsoortinniarlugu.